

桂海虞衡志



桂海虞衡志目錄

志巖洞

志金石

志香

志酒

志器

志禽

志獸

志虫魚

桂海虞衡志
目錄

志花

志果

志草木

雜志

志蠻

目錄終

桂海巖洞志

宋 范成大紀 明潘之淙閱

余嘗評桂山之奇宜爲天下第一士大夫落南者少徃徃不知而聞者亦不能信余生東湖而北撫幽薊南宅交廣西使岷峩之下三方皆走萬里所至無不登覽太行常山衡嶽廬阜皆崇高雄厚雖有諸峯之名政爾魁然大山峯云者蓋強名之其最號奇秀莫如池之九華歛之黃山括之仙都溫之鴈蕩夔之巫峽此天下同稱之者然皆數峯而

桂海巖洞志

一

止爾又在荒絕僻遠之瀕非几杖間可得且所以能拔乎其萃者必因重岡複嶺之勢盤亘而起其發也有目來桂之千峯皆旁無延緣悉自平地巖然特立玉筍瑤簾森列無際其怪且多如此誠當爲天下第一韓退之詩云水作青羅帶山如碧玉簪柳子厚訾家洲記云桂州多靈山發地峭堅林立四野黃魯直詩云桂嶺環城如鴈蕩平地蒼玉忽差峩觀三子語意則桂山之奇固在目中不待余言之贅頃嘗圖其真形寄吳中故人蓋無深信

者此未易以口舌爭也山皆中空故峯下多佳
洞有名可紀者三十餘所皆去城不過七八里近
者二三里一日可以徧至今推其尤者記其畧
讀書巖在獨秀峯下直立郡治後爲桂主山傍無坡
阜突起千丈峯趾石屋有便房石榻石牖如環堵之
室顏延年守郡時讀書其中

伏波巖突然而起且千丈下有洞可容二十榻穿鑿
通透戶牖傍出有懸石如柱去地一線不合俗名馬
伏波試劍石前浸江濱波浪洶湧日夜漱齧之

桂陽巖洞志

疊綵巖在八桂堂後支徑登山太半有洞曲轉穿山
山背

白龍洞在南溪平地半山中龕有大石屋由屋右壁
入洞行半途有小石室

劉仙巖在白龍洞之陽仙人劉仲遠所居也石室高
寒出半山間

華景洞高廣如十間屋洞門亦然

水月洞在宜山之麓其半枕江天然剗刻作大洞門
透徹山背頂高數十丈其形正員堊之端整如大月

輪江別派流貫洞中踞石弄水如坐捲蓬大橋下
龍隱洞龍隱巖皆在七星山脚沒江水中泛舟至石
壁下有洞門高可百丈鼓櫂而入仰觀洞頂有龍
跡天矯若印泥然其長竟洞舟行僅一箭許別有洞
門可出巖在洞側山半有小寺卽巖爲佛堂不復屋
雉巖亦江濱獨山有小洞洞門下臨灘江

立魚峯在西山後雄偉高峻如植立一魚餘峯甚多
皆蒼石刻峭

棲霞洞在七星山七星山者七峯位置如北斗又一

桂海巖洞志

三

小峯在傍曰輔星石洞在山半腹入石門下行百餘
級得平地可坐數十人傍有兩路其一西行兩壁石
液凝沍玉雪晶熒頂高數十丈路闊亦三四丈如行
通衢中頓足曳杖鏗然有聲如鼓鐘聲蓋洞之下又
有洞焉半里遇大壑不可進一路北行俯樓而入數
步則寬廣兩傍十許丈鍾乳垂下纍纍凡乳牀必因
石脉而出自頑石出也進里餘所見益奇又行食
頃則多岐遊者恐迷途不敢進云通九疑山也
元風洞去棲霞傍數百步風自洞中出寒如冰雪

元字

胡涓
切

曾公洞舊名冷水巖山根石門砢然入門石橋甚華
曾丞相子宣所作有澗水莫知所從來自洞中右旋
東流橋下復自右入莫知所往或謂湫流入于江也
度橋有仙田數畝過田路窄且濕俯視石罅尺餘匍
匐而進旋復高曠可通棲霞

屏風巖在平地斷山峭壁之下入洞門上下左右皆
高廣百餘丈中有平地可宴百客仰視鍾乳森然倒
垂者甚多躡石磴五十級有石穴通明透穴而出則

桂海巖洞志

四

山川城郭恍然無際余因其處作朝天觀而命其洞
曰空明

隱山六洞皆在西湖中隱山之上一日朝陽二日夕
陽三日南華四日北牖五日嘉蓮六日白萑泛湖泊
舟自西北登山先至南華出洞而西至夕陽洞窮有
石門可出至北牖出洞十許步至朝陽又西至北牖
穴口隘狹側身入有穴通嘉蓮西湖之外既有四山
巉巖碧玉千峯倒影水面固已奇絕而湖心又浸陰
山諸洞之外別有奇峯繪畫所不及荷花時有泛舟

故事勝賞甲於東南

北潛洞在隱山之北中有石室石臺石果之屬石果作荔枝胡桃棗栗之形人采取玩之或以釘盤相問遺

南潛洞在西湖中羅家山上

佛子巖亦名鍾隱巖去城十里號最遠一山萃起莽蒼中山腰有上中下三洞最廣中洞明敞高百許丈上洞差窄一小寺就洞中結架因石屋爲堂室

虛秀洞去城差遠大石室面平野室左右皆有徑隧

桂海巖洞志

五

各數十百步穿透兩傍亦臨平野以上所紀皆附郭可日涉者餘外邑巖洞尚多不可皆到興安石乳洞最勝余罷郡時過之上中下亦三洞此洞與棲霞相甲乙他洞不及也陽朔亦有綉山羅漢白鶴華蓋明珠五洞皆奇又聞容州都嶠有三洞天融州有靈巖真仙洞世傳不下桂林但皆在瘴地士大夫尤罕到

桂海金石志

宋 范成大紀 明何士鑪閱

本草有玉石部專主藥物非療病雖重不錄此篇亦主爲方藥所須者

生金出西南州峒生山谷田野沙土中不由礦出也峒民以淘沙爲生坏土出之自然融結成顆大者如麥粒小者如麩片便可鍛作服用但色差淡耳欲令精好則重鍊取足色耗去什二三旣鍊則是熟金丹竈所須生金故錄其所出

桂海金石志

丹砂本草以辰砂爲上宜砂次之今宜山人云出砂處與湖北犬牙山北爲辰砂南爲宜砂地脉不殊無甚分別宜砂老者白色有墻壁如鏡生白石牀上可入煉勢敵辰砂本草圖經乃云宜砂出土石間非白石牀所生卽是未識宜砂也別有一種色紅質嫩者名土坑砂乃是出土石間者不甚耐火邕州亦有砂大者數十百兩作塊黑闇少墻壁嚼之紫黛不堪入藥彼人惟以燒取水銀圖經又云融州亦有砂今融州元無砂邕融聲相蓋誤云

水銀以邕州溪洞朱砂末之入鑪燒取極易成以百兩爲一銚銚之制以猪胞爲骨外糊厚紙數重貯之不漏

鍾乳桂林接宜融山中洞穴至多勝連州遠甚余遊洞親訪之仰視石脉湧起處卽有乳牀如玉雪石液融結所爲也乳牀下如倒數峯小山峯端漸銳且長如冰柱柱端輕薄中空如鶯管乳水滴瀝未已且滴且凝此乳之最精者以竹管仰盛折取之鍊治家又以鶯管之端尤輕明如雲母爪甲者爲勝

桂海金石志

二

銅邕州右江州峒所出掘地數尺卽有礦故蠻人好用銅器

綠銅之苗也亦出右江有銅處生石中質如石者名石綠又有一種脆爛如碎土者名泥綠品最下價亦賤

滑石桂林屬邑及猺洞中皆出有白黑二種功用相似初出如爛泥見風則堅又謂之冷石土人以石炭朽壁及未乾時以滑石末拂拭之光瑩如玉

鉛粉桂州所作最有名謂之桂粉其粉以黛鉛著糟

薨化之

無名異小黑石子也桂林山中極多一包數百枚

石梅生海中一叢數枝橫斜瘦硬形色真枯梅也雖巧工造作所不能及根所附着如覆菌或云本質爲海水所化如石蟹石蝦之類

石柏生海中一幹極細上有一葉宛是側柏扶疎無小異根所附着如烏藥大抵皆化爲石矣此與石梅雖未詳可以入藥否然皆奇物不可不志

桂海香志

宋 范成大紀 明徐仁中閱

南方火行其氣炎上藥物所賦皆味辛而嗅香如
沉淺之屬世專謂之香者又美之所鍾也世皆云
二廣出香然廣東香乃自舶上來廣右香產海北
者亦凡品惟海南最勝人士未嘗落南者未必盡
知故著其說

沉水香上品出海南黎峒一名土沉香少大塊其次
如蘭栗角如附子如芝菌如茅竹葉者佳至輕薄如

桂海香志

一

紙者入水亦沉香之節因久蟄土中滋液下流結而
爲香採時香面悉在下其背帶木性者乃出土上環
島四郡界皆有之悉冠諸蕃所出又以出萬安者爲
最勝說者謂萬安山在島正東鍾朝陽之氣香尤醞
藉豐美大抵海南香氣皆清淑如蓮花梅英鶯梨密
脾之類焚一博投許氣翳彌室翻之四面悉香至煤
燼氣不焦此海南香之辨也北人多不甚識蓋海上
亦自難得省民以牛博之於黎一牛博香一擔歸自
差擇得沉水十不一二中州人士但用廣州舶上占

城真臘等香近年又貴丁流眉來者余試之乃不及海南中下品舶香往往腥烈不甚腥者意味又短帶木性尾煙必焦其出海北者生交趾及交人得之海外蕃舶而聚于欽州謂之欽香質重實多大礧氣尤酷烈不復風味惟可入藥南人賤之

蓬萊香亦出海南卽沉水香結未成者多成片如小笠及大菌之狀有經一二尺者極堅實色狀皆似沉香惟入水則浮剝去其背帶木處亦多沉水

鷓鴣斑香亦得之于海南沉水蓬萊及絕好箋香中

桂海香志

二

槎牙輕鬆色褐黑而有白斑點點如鷓鴣臆上毛氣尤清婉似蓮花

箋香出海南香如蝟皮栗蓬及漁蓑狀蓋修治時雕鏤費工去木畱香刺棘森然香之精鍾於刺端芳氣與他處箋香夔別出海北者聚於欽州品極凡與廣東船上生熟速結等香相埒海內箋香之下又有重漏生結等香皆下色

光香與箋香同品第出海北及交趾亦聚於欽州多大礧如山石枯槎氣麤烈如焚松檜曾不能與海南

箋香比南人常以供日用及常程祭享

沉香出交趾以諸香草合和密調如薰衣香其氣溫
磨自有一種意味然微昏鈍

香珠出交趾以泥香捏成小巴豆狀琉璃珠間之綵
絲貫之作道人數珠入省地賣南中婦人好帶之
思勞香出日南如乳香歷青黃褐色氣如楓香交趾
人用以合和諸香

排草出日南狀如白茅香芬烈如麝香亦用以合香
諸草香無及之者

桂海香志

檳榔苔出西南海島生檳榔木上如松身之艾蒿單
焚極臭交趾人用以合泥香則能成溫磨之氣功用
如甲香

檄欖香檄欖木脂也狀如黑膠飴江東人取黃連木
及楓木脂以爲欖香蓋其類出于檄欖故獨有清烈
出塵之意品格在黃連楓香之上桂林東江有此果
居人采香賣之不能多得以純脂不雜木皮者爲佳
零陵香宜融等州多有之土人編以爲蓆薦坐褥性
煖宜人零陵今永州實無此香

桂海酒志

宋 范成大紀 明潘之淙閣

余性不能酒士友之飲少者莫余若而能知酒者亦莫余若也頃數士于朝游王公貴人家未始得見名酒使虜至燕山得其宮中酒號金蘭者乃大佳燕西有金蘭山汲其泉以釀及來桂林而飲瑞露乃盡酒之妙聲震湖廣則雖金蘭之勝未必能頡頏也

瑞露帥司公厨酒也經撫所前有井清烈汲以釀遂
桂海酒志

有名今南庫中自出一泉近年只用庫井酒仍佳
古辣泉古辣本賓橫間墟名以墟中泉釀酒既熟不
煮埋之地中日足取出

老酒以麥麴釀酒密封藏之可數年士人家尤貴重
每歲臘中家家造鮓使可爲卒歲計有貴客則設老
酒冬酢以示勤婚娶亦以老酒爲厚禮

桂海器志

宋 范成大紀 明何士鎮閱

南州風俗獠雜蠻徭故凡什器多詭異而外蠻兵甲之製亦邊備之所宜知者

竹弓以熏竹爲之筋膠之制一如角弓惟揭箭不甚力

黎弓海南黎人所用長稍木弓也以藤爲弦箭長三尺無羽鏃長五寸如茨菰葉以無羽故射不遠三四丈然中者必死

桂海器志

蠻弩諸峒徭及西南諸蕃其造作畧同以硬木爲弓椿甚短似中國獵人射生弩但差大耳

徭人弩又名編架弩無箭槽編架而射也

藥箭化外諸蠻所用弩雖小弱而以毒藥濡箭鋒中者立死藥以蛇毒草爲之

蠻甲惟大理國最工申冑皆用象皮胸背各一大片如龜殼堅厚與鐵等又聯綴小皮片爲披膊護項之屬製如中國鐵甲葉皆朱之兜鍪及甲身內外悉朱地間黃黑漆作百花蟲獸之文如世所用犀毗器極

工妙又以小白貝纍纍駱甲縫及裝兜鍪疑猶傳古
貝冑朱綬遺製云

黎兜鍪海南黎人所用以藤織爲之

雲南刀卽大理所作鐵青黑沉沉不鏽南人最貴之
以象皮爲鞘朱之上亦畫犀毗花文一鞘兩室各函
一刀靶以皮條纏束貴人以金銀絲

峒刀兩江州峒及諸外蠻無不帶刀者一鞘二刀與
雲南同但以黑漆雜皮爲鞘

黎刀海南黎人所作刀長不過一二尺靶乃三四寸

桂海器志

二

織細藤纏束之靶端插白角片尺許如鴟鵂尾以爲
飾

蠻鞍西南諸蕃所作不用韉但空垂兩木鐙鐙之狀
刻如小龕藏足指其中恐入榛棘傷足也後鞞鍤木
爲大錢纍纍貫數百狀如中國驟驢鞞

蠻鞭刻木節節如竹根朱墨間漆之長纔四五寸其
首有鐵環貫二皮條以策馬

花腔腰鼓出臨桂職田鄉其土特宜鼓腔村人專作
窰燒之油畫紅花紋以爲飾

銅鼓古蠻人所用南邊土中時有掘得者相傳爲馬
伏波所遺其製如坐墩而空其下滿鼓皆細花紋極
工緻四角有小蟾蜍兩人昇行以手拊之聲全似鞞
鼓

銳鼓徭人狀如腰鼓腔長倍之上銳下侈亦以皮
鞞植于地坐拊之

盧沙徭人樂狀類簫縱八管橫一管貫之

胡盧笙兩江峒中樂

藤合屈藤盤繞成柈合狀漆固護之出藤梧等郡

桂海器志

三

雞毛筆嶺外亦有兔然極少俗不能爲兔毫筆率用
雞毛其鋒踉蹌不聽使

練子出兩江州洞大畧似苧布有花紋者謂之花練
土人亦自貴重

綵亦出兩江州洞如中國線羅上有徧地小方勝紋
蠻氊出西南諸蕃以大理者爲最蠻人晝披夜臥無
貴賤人有一蕃

黎幕出海南黎洞人得中國錦綵折取色絲間木綿
挑織而成每以四幅聯成一幕

黎單亦黎人所織青紅間道木綿布也桂林人多買以爲臥具

檳榔合南人旣喜食檳榔其法用石灰或蜆灰并扶留藤同咀則不澀土人家至以銀錫作小合如銀錠樣中爲三室一貯灰一貯藤一貯檳榔

鼻飲杯南人習鼻飲有陶器如杯椀旁植一小管若瓶嘴以鼻就管汲酒漿暑月以飲水云水自鼻入咽快不可言邕州人已如此記之以發覽者一胡盧也牛角杯海旁人截牛角令平以飲酒亦古兕觥遺意

桂海器志

四

蠻椀以木刻朱黑間漆之侈腹而有足如敦甌之形竹釜徭人所用截大竹筒以當鑪鼎食物熟而竹不燔蓋物理自爾非異也

戲面桂林人以木刻人面窮極工巧一枚或值萬錢

桂海禽志

宋 范成大紀 明潘之淇闡

南方多珍禽非君子所問又余以法禁采捕甚急故不能多識偶於人家見之及有異聞者錄以備博物

孔雀生高山喬木之上人探其雛育之喜臥沙中以沙自浴

雄者尾長數尺生三年尾始長歲尾夏秋復生羽不可近目損人飼以猪腸及生菜惟不食菘

桂海禽志

鸚鵡近海郡尤多民或以鸚鵡爲鮓又以孔雀爲腊皆以其易得故也此二事載籍所未紀自余始志之南人養鸚鵡者云此物出炎方稍北中冷則發瘴瘵戰如人患寒熱以柑子飼之則愈不然必死

白鸚鵡大如小鶩亦能言羽毛玉雪以手撫之有粉粘著指掌如蛺蝶翅

鳳如喜雀色紺碧頸毛類雄鷄鬃頭有冠尾垂二骨各長一尺四五寸其杪始有毛羽一簇冠尾絕異大畧如鳳鳴聲清越如笙簫然度曲妙合宮商又

能爲百蟲之音生左右江溪洞中極難得然書傳未
之紀當由人罕識云

秦吉了如鸚鵡紺黑色丹味黃距目下連頂有深黃
文頂毛有縫如人分髮能人言比鸚鵡尤慧大抵鸚
鵡如兒女吉了聲則如丈夫出邕州溪洞中唐書林
邑出結遼鳥林邑今占城去邕欽州但隔交趾疑卽
吉了也

錦鷄又名金鷄形如小雉湖南北亦有之

山鳳皇狀如鶩鴈嘴如鳳巢兩江深林中伏卵時雄
桂海禽志

者以木枝雜桃膠封其雌于巢獨畱一竅雄飛求食
以飼之子成卽發封不成則窒竅殺之此亦異物然
未之見也

翻毛鷄翻翎皆翻生彎彎向外尤馴狎不散逸二廣
皆有

長鳴鷄高大過常鷄鳴聲甚長終日啼號不絕生邕
州溪洞中

翡翠出海南邕賀二州亦有腊而賣之

灰鶴大如鶴通身灰慘色去頂二寸許毛始丹及頸

之半亦能鳴舞

鷓鴣大如竹鷄而差長頭如鷓身文亦然惟前白點正圓如珠人采食之

水雀蒼色似鵲鷓飛集戶庭翾翾然與燕雀爲伍

桂海獸志

宋 范成大紀 明潘之淙閱

獸莫巨於象莫有用于馬皆南上所宜余治馬政頗補苴漏隙其說累牘所不能載姑著其畧及畜獸稍異者併爲一篇

象出交趾山谷惟雄者則兩牙佛書云四牙又云六牙今無有

蠻馬出西南諸蕃多自毗那自杞等國來自杞取馬於大理古南詔也地連西戎馬生尤蕃

桂海獸志

大理馬爲西南蕃之最

果下馬上產小駟也以出德慶之瀧水者爲最高不踰三尺駿者有兩脊骨故又號雙脊馬健而喜行

後有三種金絲者黃玉面者黑純黑者面亦黑金絲玉面皆難得或云純黑者雄金絲者雌又云雄能嘯雌不能也後性不耐著地著地輒瀉以死煎附子汁飲之卽愈

蠻犬如獵狗警而獒

鬱林犬出鬱林州極高大垂耳拳尾與常犬異

花羊南中無白羊多黃褐白斑如黃牛又有一種深褐黑脊白斑全似鹿

乳羊本出英州其地出仙茅羊食茅舉體悉化爲肪不復有血肉食之宜人

綿羊出邕州溪洞及諸蠻國與朔方胡羊不異

麝香自邕州溪洞來者名土麝氣臊烈不及西蕃

火狸狸之類不一邕別有一種其毛色如金錢豹但其錢差大耳彼人云歲久則化爲豹其文先似之矣風狸狀似黃猿食蜘蛛晝則拳曲如蝟遇風則飛行

桂海獸志

空中其溺及乳汁主大風疾奇效

獺婦如山猪而小喜食禾田夫以機軸織絛之器掛田所則不復近安平七源等州有之

山猪卽豪猪身有棘刺能振發以射人三二百爲羣以害禾稼州洞中甚苦之

石鼠專食山豆根賓州人以其腹乾之治咽喉疾効如神謂之石鼠肚

香鼠至小僅如指擘大穴于柱中行地中疾如激箭山獺出宜州溪洞俗傳爲補助要藥洞人云獺性淫

毒山中有此物凡牝獸悉避去獺無偶抱木而枯洞
獠尤貴重云能解藥箭毒中箭者研其骨少許傅治
立消一枚直金一兩人或求買但得殺死者功力甚
劣



桂海蟲魚志

宋 范成大紀 明潘之淇閱

蟲魚微物外薄于海者其類庸可旣哉錄馮見聞者萬一

珠出合浦海中有珠池蟹戶投水採蚌取之歲有豐耗多得謂之珠熟相傳海底有處所如城郭大蚌居其中有怪物守之不可近蚌之細碎蔓延於外始得而采

車磔似大蚌海人磨治其殼爲諸玩物

桂海蟲魚志

蚺蛇大者如柱長稱之其膽入藥南人腊其皮刮去鱗以鞞鼓蛇常出逐鹿食寨兵善捕之數輩滿頭插花趨赴蛇蛇喜花必駐視漸近競拊其首大呼紅娘子蛇頭益挽不動壯士大刀斷其首衆悉奔散遠伺之有頃蛇省覺奮迅騰擲傍小木盡拔力竭乃斃數十人昇之一村飽其肉

螭蝮形似龜鼉輩背甲十三片黑白斑文相錯鱗差以成一背其邊裙闕闕嚙如鋸齒無足而有四鬣前兩鬣長狀如櫂後兩鬣極短其上皆有鱗甲以四鬣

權水而行海人養以鹽水飼以小鱗俗傳甲子庚申日輒不食謂之螭蝠齋日其說甚俚

蜈蚣有極大者

青螺狀如田螺其大兩拳指磨去麤皮如翡翠色雕琢爲酒杯

鸚鵡螺狀如蝸牛殼磨治出精采亦雕琢爲杯

貝子海傍皆有之大者如拳上有紫斑小者指面大白如玉

石蟹生海南形真是蟹云是海味所化理不可詰又桂海蟲魚志

有石蝦亦其類

鬼蛺蝶大如扇四翅好飛荔枝上

黑蛺蝶大如扇橘蠹所化北人云玄武蟬

嘉魚狀如小鮓魚多脂味極腴美出梧州火山人以爲鮓餉遠

蝦魚出灘水肉白而豐味似蝦而鬆美

竹魚出灘水狀似青魚味如鰕魚南中魚品如鯉鯽輩皆有之而以蝦竹二魚爲珍

天蝦狀如大飛蟻秋社後有風雨則群墮水中有小

翅人候其墮掠取之爲鮓

桂海蟲魚志

三

桂海花志

宋 范成大紀 明何士錫閱

桂林具有諸草花木牡丹芍藥桃杏之屬但培漑不力存形似而已今著其上產獨宜者凡北州所有皆不錄

上元紅深紅色絕似紅木瓜花不結實以燈夕前後開故名

白鶴花如白鶴立春開

南山茶葩萼大倍中州者色微淡葉柔薄有毛別自

桂海花志

有一種如中州所出者

紅荳蔻花叢生葉瘦如碧蘆春末發初開花先抽一餘有大籜包之籜解花見一穗數十蕊淡紅鮮妍如桃杏花色蕊重則下垂如蒲萄又如火齊纓絡及剪綵鸞枝之狀此花無實不與草荳蔻同種每蕊心有兩瓣相竝詞人托興曰比目連理云

泡花南人或名抽花春末開蕊圓白如大珠既折則似茶花氣極清芳與茉莉素馨相逼番人采以蒸香風味超勝

紅蕉花葉瘦類蘆箬心中抽條條端發花葉數層日
折一兩葉色正紅如榴花荔子其端各有一點鮮綠
尤可愛春夏開至歲寒猶芳又有一種根出土處特
肥飽如膽餅名膽餅蕉

枸那花葉瘦長畧似楊柳夏開淡紅花一朶數十萼
至秋深猶有之

史君子花蔓生作架植之夏開一簇一二十葩輕盈
似海棠

木西花葉如萱草花黃夏開

桂海花志

裹梅花卽木槿有紅白二種葉似蜀葵采紅者連葉
包裹黃梅鹽漬暴乾以薦酒故名玉修花粉紅色四
季開

象蹄花如梔子而葉小夏開至秋深

素馨花比番禺所出爲少當由風土差宜故也

茉莉花亦少如番禺以浙米漿日漑之則作花不絕
可耐一夏花亦大且多葉倍常花六月六日又以治
魚腥水一漑益佳

石榴花南中一種四季常開夏中旣實之後秋深忽

又大發花且實枝頭碩果罅裂而其旁紅英粲然併
花實折釘盤筵極可玩

添色芙蓉花晨開正白午後微紅夜深紅

側金盞花如小黃葵葉似槿歲暮開與梅同時

桂海果志

宋 范成大紀 明孫士鑣閱

世傳南果以子名者百二十半是山野間草木實
猿狙之所甘人強名以爲果故余不能盡識錄其
識可食者五十五種

荔枝自湖南界入桂林纔百餘里便有之亦未甚多
昭平出標核臨賀出綠色者尤勝自此而南諸郡皆
有之悉不宜乾肉薄味淺不及閩中所產

龍眼南州悉有之極大者出邕州圍如當二錢但肉

桂海果志

薄不能遠過常品爲可恨

饅頭柑近蒂起饅頭尖者味香勝可埒永嘉孔柑

金橘出營道者爲天下冠出江浙者皮甘肉酸不逮
矣

綿李味甘美勝常品擘之兩片開如離核桃

石栗圓如彈子每顆有梗抱附之類杓柄肉黃白甘
韌似巴欖子仁附肉有白靨不可食發病北人或呼

爲海胡桃

龍荔殼如小荔枝肉味如龍眼木身葉亦似二果故

名可蒸食不可生啖令人發癩或見鬼物三月開小白花與荔枝同時

木竹子皮色形狀全似大枇杷肉甘美秋冬間實冬桃狀如棗深碧而光軟爛甘酸春夏熟

羅望子殼長數寸如肥皂又如刀豆色正丹內有二三實煨食甘美

人面子如大梅李核如人面兩目鼻口皆具肉甘酸宜蜜餞

烏欖如橄欖青黑色肉爛而甘

桂海果志

二

方欖亦橄欖類三角或四角出兩江州洞

椰子木身葉悉類椶櫚檣榔之屬子生葉間一穗數枚枚大如五升器果之大者謂惟此與波羅蜜等耳皮中子殼可爲器子中瓢白如玉味美如牛乳瓢中酒新者極清芳久則渾濁不堪飲

蕉子芭蕉極大者凌冬不凋中抽幹長數尺節節有花花褪葉根有實去皮取肉軟爛如綠柿極甘冷四季實土人或以飼小兒云性涼去客熱以梅汁漬暴乾按令扁味甘酸有微霜世所謂芭蕉乾者是也又

名牛子蕉

雞蕉子小如牛蕉亦四季實

芽蕉子小如雞蕉尤香嫩甘美秋初實

紅鹽草果取生草荳蔻入梅汁鹽漬令色紅暴乾以
薦酒

鸚鵡舌卽紅鹽草果之珍者實始結卽頻取紅鹽乾
之纔如小舌

八角茴香北人得之以薦酒少許咀嚼甚芳香出左
右江州洞中

桂海果志

三

餘甘子多販入北州人皆識之其木可以制器

五梭子形甚詭異瓣五出如田家碌碡狀味酸久嚼

微甘閩中謂之羊桃

黎朦子如大梅復似小橘味極酸

波羅蜜大如冬瓜外膚礪砢如佛髻削其皮食之味
極甘子練悉如冬瓜生大木上秋熟

柚子南州名臭柚大如瓜人亦食之皮甚厚打碑者
卷皮蘸墨以代氈刷宜墨而不損紙極便于用此法
可傳但北州無許大柚耳

櫓罌子大如半升椀諦視之數十房攢聚成毬每房有縫冬生青至夏紅破其瓣食之微甘

槎擦子如錐栗肉甘而微澀

地蠶生土中如小蠶又似甘露子

赤柚子如橄欖皮青肉赤以下竝春實

火炭子如烏李

山韶子色紅肉如荔枝以下八種竝夏實

山龍眼色青肉如龍眼

部諦子色黃如大石榴

桂海果志

木頑子如淡黃大李

粘子如指面大褐色

羅晃子如橄欖其皮七重

千歲子如青黃李味甘

赤棗子如酸棗味酸

藤韶子大如鳧卵柿以下十三種竝秋實

古米子殼黃中有肉如米粒

殼子如青梅味甘

藤核子生白藤上如小蒲桃

木連子如胡桃紫色

蘿蒙子黃如大橙柚

毛栗如橡栗

特乃子狀似榧而圓長端正

不納子似黃熟小梅絕易爛爛卽破肉附核可爲經珠似菩提子

羊矢子色狀全似羊矢味亦不佳

日頭子狀如櫻桃色■如蒲桃穗

秋風子色狀俱似棟子

桂海果志

五

黃皮子如小棗

朱圓子正圓深紅狀如棟子以下六種皆冬實

匾桃大如桃而匾色正青

粉骨子皮黃色如粉

塔骨子匾如大橘皮裏空虛

布衲子似李而黃

黃肚子如小石榴

桂海草木志

宋 范成大紀 明曾從志閱

異草瑰木多生窮山荒野其不中醫和匠石者人亦不采故余所識者少惟竹品乃多桀異併附于錄

桂南方奇木上藥也桂林以桂名地實不產而出于賓宜州凡木葉心皆一縱理獨桂有兩紋形如圭製字者意或出此葉味辛甘與皮無別而加芳美人喜咀嚼之

桂海草木志

榕易生之木又易高大可覆數畝者甚多根出半身附榦而下以入土故有榕木倒生根之語禽鳥銜其子寄生他木上便蔚茂根下至地得土氣又則過其所寄

沙木與杉同類尤高大葉尖成叢穗少與杉異枕榔木身直如杉又如欂櫨有節似大竹一榦挺上高數丈開花數十穗綠色

思儻木生兩江州洞堅實漬鹽水中百年不腐膜脂木堅緻色如膜脂可斲作出融州及州洞桂林

屬縣亦有之

雞桐葉如楝其葉煮湯療足膝疾

龍骨木色翠青狀如枯骨

風膏藥葉如冬青治太陽疼頭目昏眩

南漆如稀飴氣如松脂霑霑無力

蕩竹葉大且密畧如蘆葦

澀竹膚麤澀如木工所用砂紙可以錯磨爪甲

人面竹節密而凸宛如人面入採爲拄杖

釣絲竹類蕩竹枝極柔弱

桂海草木志

二

斑竹中有疊暈江浙間斑竹直一淚痕無暈也

貓頭竹質性類筍竹

桃枝竹多生石上葉如小櫻櫚人以大者爲杖

笏竹刺竹也芒棘森然

箭竹山中悉有

宿根茄茄本不凋明年結實

銅鼓草其實如爪療瘡瘍毒

大蒿容梧道中久葉雪處年深滋長大者可作屋

柱小亦中肩輿之扛

石髮出海上纖長如絲縷

匾菜細如荇蒂匾如薤菜長一二尺

都管草一莖六葉辟蜈蚣蛇

花藤鏃以爲器用中有花紋

胡蔓藤毒草也揉其草漬之水入口卽死

桂海雜志

宋 范成大紀 明陳國俊閱

嶠南風土之異宜錄以備博聞而不可以部居謂之雜志

雪南州多無雪霜草木皆不改柯易葉獨桂林歲歲得雪或臘中三白然終不及北州之多靈川典定之間兩山蹲踞中容一馬謂之巖關朔雪至關輒止大盛則度送至桂林城下不復南矣

風廣東南海有颶風西路稍北州縣悉無之獨桂林桂海雜志

多風秋冬大甚拔木飛瓦晝夜不息俗傳朝作一日止暮七日夜半則彌旬去海猶千餘里非颶也土人自不知其說余試論之桂林地勢視長沙番禺在千丈之上高而多風理固然也

癸水桂林有古記父老傳誦之畧曰癸水繞東城永不見刀兵癸水灘江也

瘴二廣惟桂林無之自是而南皆瘴鄉矣瘴者山嵐水毒與草莽沴氣鬱勃蒸熏之所爲也其中人如瘡狀治法雖多常以附子爲急須不換金正氣散爲通

用邕州兩江水土尤惡一歲無時無瘴春日青草瘴夏曰黃梅瘴六七月曰新禾瘴八九月曰黃茅瘴土人以黃茅瘴為尤毒桂嶺舊不知的實所在城北五里有尋丈小坡立石其上刻曰桂嶺賀州自有桂嶺縣相傳始名嶺在其地今小坡非也

俗字邊遠俗陋牒訴券約專用土俗書桂林諸邑皆

然今姑記臨桂數字雖甚鄙野而偏傍亦有依附

矮音不長也閩音坐于門中穩也奎亦音大坐亦穩也

仆音小兒也夭音人瘦弱也歪音人亡絕也孱音不

桂海雜誌

能舉足也妖音女大及姊也岳音山石之巖窟也門

攬音門橫關也他不能悉紀余閱訟牒二年習見之大

理國間有文書至南邊及商人持其國佛經題識猶

有用囧字者國武后所作國字也唐書稱大禮國今

其國止用理字

捲伴南州法度踈畧婚姻多不正村落強暴竊人妻

女以逃轉移他所安居自若謂之捲伴言捲以為伴

侶也已而復為後人捲去至有歷數捲未已者其舅

姑若前夫訪知所在請官自陝官為追究往往所謂

前夫亦是捲伴得之復爲後人所捲惟其親父母
弟及初娶者所訢卽歸始初被捲之家

草子卽寒熱時疫南中吏卒小民不問病源但頭痛
體不佳便謂之草子不服藥使人以小錐刺唇及舌
尖出血謂之挑草子實無加損于病必服藥乃愈

桂海蠻志

宋 范成大紀 明何士鋌闕

廣西經畧使所領二十五郡其外則西南諸蠻蠻之區落不可殫記姑記其聲問相接帥司常有事于其地者數種曰羈縻州洞曰徭曰蠻曰黎曰蠻通謂之蠻

羈縻州洞隸邕州左右江者爲多舊有四道儂氏謂安平武勒忠浪七源四州皆儂姓又有四道黃氏謂安德歸樂露城田州皆黃姓又有武侯延衆石門感

桂海蠻志

德四鎮之民自唐以來內附分析其種落大者爲州小者爲縣又小者爲洞國朝開拓浸廣州縣洞五十餘所推其雄長者爲首領藉其民爲壯丁其人物獷悍風俗荒怪不可盡以中國教法繩治姑羈縻之而已有知州權州監州知縣知洞其次有同發遣權發遣之屬謂之主戶餘民皆稱提陀猶言百姓也其田計口給民不得典賣惟自開荒者由已謂之祖業口分田知州別得養印田猶圭田也權州以下無印記者得蔭免田旣各服屬其民又以攻剽山獠及博買

嫁娶所得生口男女相配給田使耕教以武技世世隸屬謂之家奴亦曰家丁民戶強壯可教勸者謂之田子田丁亦曰馬前牌總謂之洞丁今黃姓尚多而儂姓絕少智高亂後儂氏善良許從國姓今多姓趙氏有舉洞純一姓者婚媾不以爲嫌曾豪或娶數妻皆曰媚娘宜州管下亦有羈縻州縣十餘所其法制尤疏幾似化外其尤者曰南丹州待之又與他州洞不同特命其首領莫氏曰刺史月支鹽料及守臣供給錢其說以謂宜州徼外卽唐黃家賊之地崇建南

桂海蠻志

方使控制之莫氏家人亦有時相攻奪今刺史莫延

甚逐其弟延廩而自立延廩奔朝廷謂之出宋

凡州洞歸

明者皆

稱出宋

獠本五溪槃瓠之後其壤接廣右者靜江之興安義寧古縣融州之融水懷遠縣界皆有之生深山重溪中椎髻跣足不供征役各以其遠近爲伍

獠在右江溪洞之外俗謂之山獠依山林而居無曾長版籍蠻之荒忽無常者也以射生食動而活蟲豸能蠕動者皆取食無年甲姓名一村中惟有事力者

曰郎火餘但稱火舊傳其類有飛頭鑿齒鼻飲白衫
花面赤禪之屬二十一種今在江西南一帶甚多殆
百餘種也

蠻南方曰蠻今郡縣之外羈縻州洞雖故皆蠻地猶
近省民供稅役故不以蠻命之遇羈縻則謂之化外
真蠻矣區落連亘接于西戎種類殊詭不可勝記今
志其近桂林者宜州有西南蕃大小張大小王龍石
滕謝諸蕃地與牂牁接人椎髻跣足或著木履衣青
花斑布以射獵讐殺爲事又南連邕州南江之外者

桂海蠻志

羅殿自杞等以國名羅孔特磨白衣九道等以道名
而峩州以西別有酋長無所統屬者蘇綺羅坐夜面
計利流求萬壽多嶺阿悞等蠻謂之生蠻酋自謂太
保大抵與山獠相似但有首領耳羅殿等處乃成聚
落亦有文書公文稱守羅殿國王其外又有大蠻落
西曰大理東曰交趾大理南詔國也交趾古交州治
龍編又爲安南都護府

黎海南四郡鳴上蠻也鳴直雷州由徐開渡半日至
鳴之中有黎母山諸蠻環居四傍號黎人山極高常

在霧靄中黎人自鮮識之久晴海氣清廓時或見翠
尖浮半空云蠻皆椎髻跣足插銀銅錫釵婦人加銅
環耳墜垂肩女及笄卽黥頰爲細花紋謂之繡面女
旣黥集親客相慶賀惟婢獲則不繡面四郡之人多
黎姓蓋其裔族而今黎人乃多姓王

蜚海上水居蠻也以舟楫爲家採海物爲生且生食
之入水能視合浦珠池蚌蛤惟蜚能沒水採取旁人
以蠅繫其腰繩動搖則引而上先煮毳衲極熱出水
急覆之不然寒慄而死或遇大魚蛟鼉諸海怪爲鬻

桂海蠻志

四

鬻所觸往往潰腹折支人見血一縷浮水面知蜚死
矣